

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-8-Z/25  
**Kakanj,** 26.06.2025. godine

**Z A P I S N I K  
sa 8. redovne sjednice Općinskog vijeća održane 26.06.2025. godine (četvrtak)  
u sali Općinskog vijeća sa početkom u 09:00 sati  
(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 8. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Hamza Vahid El-Din, Amel Kusić, Dženan Ajdinović, Tarik Hodžić, Mustafa Subašić, Edin Čatić, Ilhana Alajbegović, Ilda Arnautović i Izudin Hrusto (**SDA**)

Edin Šljivo, Mensur Čehajić, Senad Softić, Vinka Aletović i Irna Imamović (**SDP BiH**)

Mirnes Pipo i Mensur Bliznović (**NV**)

Dževdet Huskić i Branko Češljic (**nakndno pristupio**) (**NS**)

Mirsad Tursum i Fahrudin Buza (**nakndno pristupio**) (**NiP**)

Mirela Kubura i Nermana Mehić (**SN**)

Rešad Merdić (**nakndno pristupio**) (**S BiH**)

Armin Bašić (**DF**)

Slaven Katičić (**HDZ BiH**)

Mujo Fafulić (**nacionalne manjine**)

**Odsutni vijećnici:** Sanda Hasagić-Terzić (**SDA**), Sanel Šabanović, Adem Bećirhodžić (**SDP BiH**), Adnan Demir (**NV**)

Predsjedavajući je konstatovao da je na sjednici u momentu prijave prisutno 23 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Mirnes Bajtarević**, općinski načelnik

**Emir Zaimović**, sekretar Općinskog vijeća

**Džihad Berbić**, pomoćnik općinskog načelnika za finansije

**Mirza Fazlić**, pomoćnik općinskog načelnika za privredu, urbanizam i zaštitu okoline

**Edin Aliefendić**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Mukades Delibašić**, pomoćnik općinskog načelnika za imovinskopravne, geodetske poslove i katastar nekretnina

**Bahrudin Arnaut**, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

**Mahir Sikira**, šef Stručne službe za poslove općinskog načelnika  
**Muhamed Kapo**, ispred Zavoda za planiranje i izgradnju

### Izjave, obrađivači, gosti

**Muamer Čelebić**, direktor JP „Grijanje“ d.o.o. Kakanj  
**Nisvet Trako**, direktor i **Magbula Ganić**, v.d. predsjednica UO JU „Dom zdravlja sa stacionarom“ Kakanj  
**Ibrahim Aličković**, šef HES-a JU „Dom zdravlja sa poloklinikom“ Kakanj  
**Naida Delibašić-Alagić**, zastupnica u Skupštini ZDK

### Predstavnici medija

**NTV IC Kakanj**  
**Radio Kakanj**

### Napomene o radu Kolegija Općinskog vijeća

Predsjedavajući je napomenuo da je u pripremi 8. redovne sjednice Općinskoga vijeća, Kolegij Općinskog vijeća dana 18.06.2025. godine, održao sjednicu na kojoj je usaglašen dnevni red sjednice. Također, po svim pristiglim predstavkama, prijedlozima i inicijativama Kolegij je zauzeo stavove i iste prosljedio nadležnim službama i organima na daljnje postupanje, te je usvojen Zaključak kojim Kolegij Općinskog vijeća traži od obrađivača tačaka za dnevni red redovnih sjednica Općinskog vijeća da materijale u Stručnu službu za poslove Općinskog vijeća dostavljaju najkasnije do sjednice Kolegija, u suprotnom materijali se neće uvrštavati u dnevni red sjednice.

### Usvajanje zapisnika sa 7. redovne sjednice Općinskog vijeća

Nije bilo primjedbi na zapisnik i isti je usvojen jednoglasno sa 21 glasom ZA.

### Komentari na dostavljene odgovore na vijećnička pitanja

**Armin Bašić:** je rekao da odgovore na postavljena pitanja nije dobio i pitao do kada će biti praksa da se odgovori na postavljena vijećnička pitanja i inicijative ne dostavljaju i ako je tako koja je svrha istih?

### Komentari na dostavljena mišljenja na vijećničke inicijative

**Dževdet Huskić:** se složio sa vijećnikom Bašićem i rekao da je na prethodnoj sjednici postavio pitanje i uputio inicijativu prema JP „Vodokom“, ali nikakve odgovore nije dobio, dok je dobio odgovor od službe da ista nije nadležna. Smatra da su Općinsko vijeće kao osnivač, te općinski načelnik i službe zajedno za upravama JP „Vodokom“ i JP „Grijanje“ nadležni za sva pitanja u vezi tih javnih preduzeća, odnosno da se niko ne može smatrati nenadležnim. Apelovao je da se izvrši pritisak na JP „Vodokom“ i JP „Grijanje“ da redovno dostavljaju odgovore na postavljena vijećnička pitanja i inicijative i podsjetio da je u ranijem periodu bila puno bolja saradnja, odnosno da se ovakve stvari nisu dešavale.

### Vijećnička pitanja

**Dževdet Huskić:** je postavio dva vijećnička pitanja. Prvo pitanje se odnosi na postojanje dokumenta u kojem su jasno definisani kratkoročni i dugoročni ciljevi Turističke zajednice, kao i aktivnosti koje se namjeravaju poduzeti u svrhu razvoja turizma na prostoru općine? Drugo pitanje je da li kod nadležnih postoji svijest da JP „Vodokom“ ne posjeduje važeću okolinsku dozvolu za sanaciju i zatvaranje postojeće deponije komunalnog otpada, kao ni za izgradnju pratećih sadržaja u skladu s regionalnim konceptom odlaganja otpada na lokalitetu „Bare“, niti posjeduje dozvolu za upravljanje animalnim otpadom na predmetnoj lokaciji, koju ne može ni pribaviti imajući u vidu da se deponija mora sanirati i zatvoriti?

**Mensur Čehajić:** je postavio dva vijećnička pitanja. Prvo pitanje je da li je u planu provođenje i uknjižba dijela puta u naselju Plandište i koji su razlozi da do sada nije postupljeno po zahtjevu MZ Plandište, od marta 2024. godine u vezi predmetne problematike? Drugo pitanje je da li postoji mogućnost da se još jednom razmotri inicijativa za oslobađanje plaćanja članarine za djecu bez roditelja, u klubovima koji se redovno finansiraju iz budžeta Općine Kakanj?

**Irna Imamović:** je postavila vijećničko pitanje da li je razmatrana ideja, odnosno da li postoji mogućnost da Općina Kakanj osnuje vlastitu apoteku koja bi organizovala rad u noćnoj smjeni, obzirom da na području općine ne postoji apoteka koja radi tokom noćnih sati zbog čega su građani nerijetko prinuđeni da u hitnim slučajevima pomoć potraže u drugim gradovima i općinama.

### Vijećničke inicijative

**Dževdet Huskić:** je pokrenuo dvije vijećničke inicijative. Prva je da se prekine s nelegalnim deponovanjem otpada u Barama i da se otpad iz Kaknja hitno počne deponovati na regionalnu deponiju Mošćanica, u skladu s praksom ostalih općina ZDK, te da se javnosti podnese izvještaj o potencijalnim ekološkim i sanitarnim posljedicama dosadašnjeg načina odlaganja otpada. Druga inicijativa je da Općina Kakanj preuzme na sebe refundaciju troškova koji nastaju prilikom obaveznog posredovanja pri razvodu braka (za stranku koja pokrene postupak razvoda), a iz razloga što tog troška nema u većini općina na prostoru ZDK, kao i u Federaciji BiH.

**Hamza Vahid El-Din:** je pokrenuo dvije vijećničke inicijative. Prva se odnosi na sanaciju potputnjaka u naselju Termoelektrana. Prolaz ispod autoceste A1 je od vitalnog značaja za stanovnike naselja koja se nalaze u tom području, posebno za učenike, a zbog činjenice da sa površine autoceste dio oborinskih voda prodire u potputnjak što stvara opasne uslove za pješake, posebno u zimskom periodu. Druga inicijativa se odnosi na postavljanje saobraćajne signalizacije na raskrsnici u naselju Malješ, na križanju regionalne ceste R-445 i lokalne ceste V divizije NOP-a, jer se radi o vrlo frekventnoj raskrsnici na kojoj nisu obilježeni pravci sa pravom prvenstva prolaza.

**Mirela Kubura:** je pokrenula vijećničku inicijativu za sanaciju stepenica na ulazu u zgradu A3 u ulici Šehida. Razlog za inicijativu je što su stepenice na ulazu u zgradu u veoma lošem stanju i neuslovne su za sve stanare, te je uz to potrebno postavljanje rukohvata na stepenicama iste zgrade kako bi se povećala sigurnost i omogućilo lakše kretanje osobama sa smanjenom pokretljivošću. Također je predložila da se parking prostor između zgrada A2 i A3 u istoj ulici naspe tamponom obzirom da nije adekvatno uređen, zbog čega u periodima padavina dolazi do stvaranja neravnina i blata.

**Irna Imamović:** je pokrenula vijećničku inicijativu da se Udruženje „Djeca sa izazovom“ Kakanj oslobodi plaćanja komunalne naknade, kao i usluga individualne komunalne potrošnje (uključujući usluge održavanja zajedničkih prostorija, grijanja, električne energije, vode i odvoza smeća). Ovo iz razloga što je Udruženje neprofitnog karaktera i sa ograničenim finansijskim sredstvima, te bi svaka ušteda doprinijela jačanju njihove djelatnosti.

**Vinka Aletović:** je pokrenula dvije vijećničke inicijative. Prva je za asfaltiranje dijela puta ispred JU „Mladost“ Kakanj. Predmetna dionica je vrlo kratka, a predstavlja problem za saobraćanje vozila i sigurnost prilikom kretanja djece i pješaka. Druga inicijativa je da se izvrši dezinfekcija štetnih insekata, posebno žohara na području općine Kakanj, što je posebno izraženo tokom ljetnog perioda kada dolazi do povećanja broja insekata koji mogu biti prenosioci mnogih zaraznih bolesti, te predlaže hitno poduzimanje mjera u skladu sa Zakonom o zaštiti stanovništva od zaraznih bolesti.

**Mensur Čehajić:** je pokrenuo dvije vijećničke inicijative. Prva se odnosi na postavljanje saobraćajnog ogleдалa u MZ Plandište (na raskrsnici kod džamije, skretanje prema gradu i skretanje prema deponiji) u skladu sa izrađenim saobraćajnim projektom od strane Instituta za saobraćaj i komunikacije Sarajevo, jer na navedenoj lokaciji često dolazi do opasnih situacija i otežanog uključivanja u saobraćaj. Druga inicijativa je za zamjenu dotrajalih i neispravnih rasvjetnih tijela na mostu u MZ Doboje. Smatra da je neophodna hitna intervencija za zamjenu rasvjetnih tijela, jer loša osvjetljenost mosta predstavlja ozbiljnu opasnost za pješake, naročito djecu i starije osobe.

Predsjedavajući je konstatovao da su vijećnici: Branko Češlijić, Ilhana Alajbegović i Mirnes Pipo podnijeli vijećničke inicijative bez govornice.

**Branko Češlijić:** je pokrenuo vijećničku inicijativu da se obavi pregled ispravnosti glavnog kanalizacionog cjevovoda od naselja Zgošća do rijeke Bosne i da se dostavi izvještaj o utvrđenom stanju. Ovo iz razloga što već godinama rijeka Zgošća u ljetnom periodu smrdi, te uz to predstavlja ozbiljan zdravstveni rizik. Prema informacijama od građana cjevovod je na više mjesta probijen zbog čega se kanalizacija izliva u rijeku Zgošću.

**Ilhana Alajbegović:** je pokrenula vijećničku inicijativu za čišćenje bazena gradske vode u MZ Donji Kakanj koji nije očišćen preko deset godina, što predstavlja veliki sanitarni problem. Zbog takvog stanja mještani duže vremena vodu ne koriste za piće, a već izvjesno vrijeme je ne koriste ni u druge svrhe (pranje suđa, odjeće i sl).

**Mirnes Pipo:** je pokrenuo vijećničku inicijativu za uklanjanje riječnog nanosa ispod mosta u naselju Hasa – Donji Kakanj. Razlog za inicijativu je što poslije obilnijih kiša i poplava, kada se rijeka Bosna izlije, ispod mosta kod greblja džemata Donji Kakanj ostane riječni nanos visine i do 25 cm što predstavlja problem pješacima, biciklistima kao i vozilima.

### **Utvrđivanje dnevnog reda**

Predsjedavajući je za 8. redovnu sjednicu predložio dnevni red po pozivu, a koji je usaglašen na sjednici Kolegija. Napomenuo je da su materijali „Prijedlog odluke o potvrđivanju rezultata izbora i dodjeli mandata za članove savjeta mjesnih zajednica na području općine Kakanj“ i „Prijedlog odluke o usvajanju Izvještaja o provedenim izborima u mjesnim zajednicama općine Kakanj“ uvršteni naknadno, jer su stigli prije slanja materijala, a sve u skladu sa usaglašenim stavom Kolegija.

U diskusiji o dnevnom redu su učestvovali općinski načelnik, Mensur Čehajić i Mustafa Subašić.

**Općinski načelnik:** je predložio da se u dnevni red uvrsti tačka „Prijedlog odluke o izmjenama i dopunama Budžeta Općine Kakanj za 2025. godinu“ za koju materijali nisu mogli biti pripremljeni ranije iz objektivnih razloga (uplata sredstava u općinski Budžet izvršena nakon održane sjednice Kolegija).

**Mensur Čehajić:** je predložio da se s dnevnog reda povuče 15. tačka „Razmatranje Građanske inicijative“ iz razloga što nisu pristigli materijali od organa i službi od kojih je Kolegij tražio očitovanje.

**Mustafa Subašić:** se zahvalio općinskom načelniku za angažman na obezbjeđenju sredstava za rekonstrukciju puta za Tršće.

Nakon diskusije Vijeće se prvo izjašnjavalo o prijedlogu općinskog načelnika i isti je jednoglasno prihvaćen sa 25 glasova ZA, te se potom Vijeće izjašnjavalo o prijedlogu vijećnika Čehajića koji je prihvaćen sa 18 glasova ZA, 5 glasova PROTIV i 2 glasa UZDRŽAN.

Nakon toga predsjedavajući je predložio da se kao prva tačka dnevnog reda razmatra „Prijedlog odluke o izmjenama i dopunama Budžeta Općine Kakanj za 2025. godinu“, a da se sve ostale tačke predloženog dnevnog reda pomjere za jedno mjesto, s tim da se 15. tačka predloženog dnevnog reda povlači, tako da bi Vijeće raspravljalo o 15 tačaka.

Prijedlog predsjedavajućeg je prihvaćen sa 20 glasova ZA, 4 glasa PROTIV, bez glasova UZDRŽAN.

### **Usvojeni dnevni red**

1. Prijedlog odluke o izmjenama i dopunama Budžeta Općine Kakanj za 2025. godinu
2. Prijedlog odluke o komunalnom redu Općine Kakanj
3. Prijedlog odluke o izmjeni Odluke o osnivanju Turističke zajednice Općine Kakanj
4. Prijedlog odluke o davanju na privremeno korištenje poslovnog prostora Turističkoj zajednici Općine Kakanj
5. Prijedlog odluke o utvrđivanju javnog interesa u svrhu izgradnje priključnog kabla za KBTS „Dumanac 2“
6. Prijedlog odluke o davanju odobrenja za produženje Ugovora o korištenju stambenih jedinica u stambenoj zgradi u ulici 311. lahke brigade bb
7. Prijedlog odluke o potvrđivanju rezultata izbora i dodjeli mandata za članove savjeta mjesnih zajednica na području općine Kakanj
8. Prijedlog odluke o usvajanju Izvještaja o provedenim izborima u mjesnim zajednicama općine Kakanj
9. Informacija o Dokumentu okvirnog budžeta Općine Kakanj za period 2026-2028
10. Izvještaj o poslovanju JP „Grijanje“ d.o.o. Kakanj sa Finansijskim izvještajem i Izvještajem o reviziji finansijskih izvještaja za 2024. godinu

11. Izvještaj o radu JU „Dom zdravlja sa stacionarom“ Kakanj sa Izvještajem o materijalno-finansijskom poslovanju za period 01.01-31.12.2024. godine
12. Plan rada i razvoja JU „Dom zdravlja sa stacionarom“ za 2025. godinu
13. Informacija o zdravstvenom stanju stanovništva općine Kakanj i informacija o epidemijama u 2024. godini
14. Prijedlog odluke o imenovanju člana Općinske izborne komisije
15. Prijedlog rješenja o privremenom imenovanju predsjednika UO JU „Dom zdravlja sa stacionarom“ Kakanj

## **1. Tačka**

### **Prijedlog odluke o izmjenama i dopunama Budžeta Općine Kakanj za 2025. godinu**

**Predlagač:** Općinski načelnik

**Obrađivač:** Služba za finansije

**Izjestilac:** Džihad Berbić, pomoćnik općinskog načelnika

U diskusiji je učestvovao Dževdet Huskić.

**Dževdet Huskić:** je rekao da je očito da se velika sredstva usmjeravaju na infrastrukturu koja nije tako davno izgrađena, te da nema odgovornosti za neke projekte koji nisu solidno implementirani što nije racionalno trošenje sredstava. Izrazio je nadu da će se rebalansom planirana sredstva što prije implementirati, te da sredstva neće ostani na računu i pri tome devalvirati, kao što je to slučaj sa sredstvima za rekonstrukciju Gradske biblioteke.

**Općinski načelnik:** je pojasnio da će se rekonstrukcija Ulice branilaca vršiti na dionici od mosta kod benzinske pumpe do donjeg mosta, te da se radi o dionici puta koja nije dosad bila rekonstruisana. Pojasnio je da se projekti koje je spominjao pomoćnik načelnika Berbić preciziraju u Budžetu zbog toga što je Općina aplicirala na kantonalna sredstva sa tim projektima te da će se, ukoliko se sredstva odobre, zajedničkim sredstvima ići u implementaciju. U vezi projekta rekonstrukcije Gradske biblioteke rekao je da je trenutno u izradi glavni projekt.

**Džihad Berbić (odgovor):** je pojasnio da se u vezi projekta koji se finansira od strane Federalnog ministarstva prometa i komunikacija procedura obavlja na nešto drugačiji način u smislu da će se sredstva prebaciti Općini tek nakon obavljenih aktivnosti.

Nakon diskusije Vijeće je jednoglasno sa 26 glasova ZA usvojilo Odluku o izmjenama i dopunama Budžeta Općine Kakanj za 2025. godinu.

## **2. Tačka**

### **Prijedlog odluke o komunalnom redu Općine Kakanj**

**Predlagač:** Općinski načelnik

**Obrađivač:** Radna grupa za izradu Odluke o komunalnom redu Općine Kakanj

**Izjestilac:** Amir Dedić, predsjednik Radne grupe

U diskusiji je učestvovao Mirnes Pipo.

**Mirnes Pipo:** je predložio da se iz prijedloga odluke briše stav (13) u članu 91., te da se u stavu (2) člana 122. zabrani spaljivanje otpada, plastike i guma.

**Amir Dedić:** je rekao da je prihvatljivo da se briše stav (13) člana 91., a što se tiče zabrane spaljivanja rekao je da je to već zabranjeno odredbama odluka koje uređuju oblast vatrogastva i zaštite od požara.

Predsjedavajući je najavio pauzu od 5 minuta.

**Amir Dedić:** je rekao da je usaglašeno da se briše stav (13) člana 91., a da ostale odredbe prijedloga odluke ostaju u predloženom obliku.

Nakon diskusije Vijeće je uz amandman vijećnika Pipe jednoglasno sa 22 glasa ZA usvojilo Odluku o komunalnom redu Općine Kakanj.

### **3. Tačka**

#### **Prijedlog odluke o izmjeni Odluke o osnivanju Turističke zajednice Općine Kakanj**

**Predlagač:** Općinski načelnik

**Obrađivač:** Služba za privredu, urbanizam i zaštitu okoline

**Izjavitelj:** Mirza Fazlić, pomoćnik općinskog načelnika

U diskusiji niko nije učestvovao i Vijeće je usvojilo Odluku o izmjeni Odluke o osnivanju Turističke zajednice Općine Kakanj sa 22 glasa ZA, 2 glasa PROTIV i 2 glasa UZDRŽAN.

### **4. Tačka**

#### **Prijedlog odluke o davanju na privremeno korištenje poslovnog prostora Turističkoj zajednici Općine Kakanj**

**Predlagač:** Općinski načelnik

**Obrađivač:** Služba za privredu, urbanizam i zaštitu okoline

**Izjavitelj:** Mirza Fazlić, pomoćnik općinskog načelnika

U diskusiji niko nije učestvovao i Vijeće je usvojilo Odluku o davanju na privremeno korištenje poslovnog prostora Turističkoj zajednici Općine Kakanj sa 19 glasova ZA, 2 glasa PROTIV i 2 glasa UZDRŽAN.

### **5. Tačka**

#### **Prijedlog odluke o utvrđivanju javnog interesa u svrhu izgradnje priključnog kabla za KBTS „Dumanac 2“**

**Predlagač:** Općinski načelnik

**Obrađivač:** Služba za imovinskopravne, geodetske poslove i katastar nekretnina

**Izjavitelj:** Mukades Delibašić, pomoćnik općinskog načelnika

U diskusiji niko nije učestvovao i Vijeće je jednoglasno sa 25 glasova ZA usvojilo Odluku o utvrđivanju javnog interesa u svrhu izgradnje priključnog kabla za KBTS „Dumanac 2“.

### **6. Tačka**

#### **Prijedlog odluke o davanju odobrenja za produženje Ugovora o korištenju stambenih jedinica u stambenoj zgradi u ulici 311. lahke brigade bb**

**Predlagač:** Općinski načelnik

**Obrađivač:** Služba za imovinskopravne, geodetske poslove i katastar nekretnina

**Izjavitelj:** Mukades Delibašić, pomoćnik općinskog načelnika

U diskusiji niko nije učestvovao i Vijeće je jednoglasno sa 24 glasa ZA usvojilo Odluku o davanju odobrenja za produženje Ugovora o korištenju stambenih jedinica u stambenoj zgradi u ulici 311. lahke brigade bb.

### **7. Tačka**

#### **Prijedlog odluke o potvrđivanju rezultata izbora i dodjeli mandata za članove savjeta mjesnih zajednica na području općine Kakanj**

**Predlagač:** Općinski načelnik

**Obrađivač:** Služba za opću upravu, radne i zajedničke poslove, lokalnu samoupravu i mjesne zajednice

**Izjavitelj:** Bahrudin Arnaut, pomoćnik općinskog načelnika

U diskusiji su učestvovali: Mensur Čehajić i Slaven Katičić.

**Mensur Čehajić:** je upitao na koji način će se izvršiti popunjavanje mjesnih savjeta, obzirom da ima nekompletnih mjesnih savjeta.

**Slaven Katičić:** je tražio da se ispravi broj glasova za kandidata Aldina Kadrića jer on po potvrđenim rezultatima nije dobio ovako mali broj glasova i trebao bi biti predsjednik MZ Poljani, a u prijedlogu ne piše tako.

**Bahrudin Arnaut:** je rekao da će procedura najvjerovatnije provesti na način da će Vijeće imenovati komisiju koja će na zborovima građana popuniti savjete koji su ostali nekompletni, te je prihvatio sugestiju da se koriguje broj glasova kandidata Aldina Kadrića konstatujući da se radi o tehničkoj grešci.

Nakon diskusije Vijeće je jednoglasno sa 26 glasova ZA usvojilo Odluku o potvrđivanju rezultata izbora i dodjeli mandata za članove savjeta mjesnih zajednica na području općine Kakanj sa ispravkom koju je sugerisao Slaven Katičić.

## **8. Tačka**

### **Prijedlog odluke o usvajanju Izvještaja o provedenim izborima u mjesnim zajednicama općine Kakanj**

**Predlagač:** Općinski načelnik

**Obrađivač:** Služba za opću upravu, radne i zajedničke poslove, lokalnu samoupravu i mjesne zajednice

**Izjestilac:** Bahrudin Arnaut, pomoćnik općinskog načelnika

U diskusiji su učestvovali: Mensur Čehajić i Mirnes Pipo.

**Mensur Čehajić:** je upitao: da li je mjesna zajednica ili neko drugi mogao predložiti prijedloge za članove mjesnih odbora obzirom na to da je Komisija samo dostavila spisak; zbog čega je došlo do izmjene sastava biračkog odbora u MZ Plandište 24h prije početka izbora i da li je sve učinjeno u skladu sa izbornim propisima; ko je bio nadležan za birački spisak i po kojem propisu je on sačinjen jer je dosta mještana iz MZ Plandište moralo glasati u MZ Kakanj I; zašto nema podatka o broju štampanih, utrošenih i preostalih izbornih listića; zašto nije bilo mobilnog tima za glasače; na koji način se vršio transport biračkih listića nakon izbora.

**Mirnes Pipo:** je upitao zašto su predsjednici MZ Bičer i MZ Poljani izabrani za predsjednike kad su imali manji broj glasova u odnosu na ostale.

**Bahrudin Arnaut (odgovor):** je vijećniku Pipi odgovorio da se radi o odustanku od mjesta predsjednika članova koji su dobili najveći broj glasova. Vijećniku Čehajiću je odgovorio da su se za članove mjesnih odbora mogli prijaviti svi koji su to željeli. Sastav biračkog odbora na Plandištu se promijenio jer nekad pojedini članovi odustanu od tog posla pa se onda iz reda iskusnih članova u izbornom procesu to mjesto popunjava. Birački spisak izrađuje Centralna izborna komisija, a po općinskoj odluci su utvrđene granice mjesnih zajednica. Mobilni tim je bio na terenu, a poseban spisak birača – izvod biračkog spiska, koje je obilazio mobilni tim je sastavni dio biračkog spiska. Dokumentacija vezana za izbore se čuva i bilo ko i bilo kad može izvršiti uvid u istu. U vezi izbornog materijala rekao je da je sve evidentirano od momenta preuzimanja izbornog materijala od strane predsjednika biračkih odbora pa do njihovog vraćanja.

**Općinski načelnik:** je rekao da je proces izbora savjeta mjesnih zajednica logistički protekao u najboljem redu iako je izlaznost bila niska. Predsjednicima i članovima mjesnih savjeta je čestitao na rezultatima, poželio im uspješan rad i izrazio nadu u korektnu buduću saradnju.

Predsjedavajući je dao pauzu od 5 minuta na prijedlog Kluba SDA.

Nakon diskusije Vijeće je jednoglasno sa 26 glasova ZA usvojilo Odluku o usvajanju Izvještaja o provedenim izborima u mjesnim zajednicama općine Kakanj.

## **9. Tačka**

### **Informacija o Dokumentu okvirnog budžeta Općine Kakanj za period 2026-2028**

**Predlagač:** Općinski načelnik

**Obrađivač:** Služba za finansije

**Izjestilac:** Džihad Berbić, pomoćnik općinskog načelnika

U diskusiji je učestvovao Mirnes Pipo.

**Mirnes Pipo:** je tražio pojašnjenje u strukturi potrošnje koje se odnosi na povećanje plata i naknada uposlenim.

**Džihad Berbić:** je rekao da je ovo okvirna projekcija koja služi za izradu godišnjeg budžeta, te da se izrađuje na osnovu Zakona o plaćama i Kolektivnog ugovora za organe uprave i sudske vlasti, Uredbe o minimalnoj plaći, kao i da se uzimaju u obzir i novi budžetski korisnici što sve sumarno daje ovako povećanje.

Nakon diskusije Vijeće je jednoglasno sa 25 glasova ZA usvojilo Zaključak o primanju k znanju Informacije o Dokumentu okvirnog budžeta Općine Kakanj za period 2026-2028

## **10. Tačka**

### **Izveštaj o poslovanju JP „Grijanje“ d.o.o. Kakanj sa Finansijskim izvještajem i Izvještajem o reviziji finansijskih izvještaja za 2024. godinu**

**Predlagač:** Skupština JP „Grijanje“ d.o.o. Kakanj

**Obradivač:** Skupština JP „Grijanje“ d.o.o. Kakanj

**Izjestilac:** Muamer Čelebić, direktor JP „Grijanje“ d.o.o. Kakanj

U diskusiji su učestvovali: Dževdet Huskić, Mirnes Pipo i Vinka Aletović.

**Dževdet Huskić:** je rekao da se iz Izvještaja vidi da je dugoročna finansijska održivost preduzeća, usljed rasta cijena energenata na minimumu, te da ovo preduzeće nema kapaciteta za razvoj, kao ni za modernizaciju i obnovu postojeće opreme. Također, infrastruktura vrelovodne i toplovodne mreže je dotrajala, a ne vidi se da ima strateških planova za njenu rekonstrukciju i širenje. Javno preduzeće nema uspostavljen sistem interne kontrole, a revizijom je utvrđeno da su se ugovori kojim je ovo preduzeće vršilo nabavke uglavnom sklapali putem direktne pogodbe, a ne javne nabavke. Postavio je dva pitanja općinskom načelniku: da li Općina Kakanj ima spremnu strategiju pružanja pomoći ovom JP i zašto nije uvedena interna revizija u javnim preduzećima na području općine Kakanj? Direktor preduzeća je postavio pitanja: koje mjere će poduzeti da unaprijedi likvidnost i stabilizira gotovinske tokove preduzeća; postoji li strateški plan obnove toplovodne mreže i koliko sredstava je predviđeno za kapitalne investicije ove godine; da li je širenje djelatnosti bilo logično kada ovo preduzeće djeluje sa visokim stepenom havarijskog rizika?

**Mirnes Pipo:** je upitao da li se radi o istoj stavci obzirom da u Izvještaju stoji da gubitaka od umanjene vrijednosti postrojenja i opreme nije bilo, a u Revizorskom izvještaju amortizacija iznosi nešto preko 300.000 KM. Također, upitao je da li je bilo isplata po tužbama radnika po granskom kolektivnom ugovoru ranije, a da nisu evidentirane u dosadašnjim izvještajima.

**Vinka Aletović:** je pitala direktora da li je planirano proširenje sistema daljinskog grijanja u MZ Kakanj II, tačnije u ulicama Patriotske lige i ulici Stjepana Kovačevića.

**Muamer Čelebić (odgovor):** je vijećniku Huskiću odgovorio da je negativni gotovinski tok u 2024. godini rezultat odluke da se ne ide u poskupljenje usluga uprkos novim cijenama JP Elektroprivreda, likvidnost nije ugrožena i nema rizika od sudskih procesa potraživača. Strateški plan postoji već dugo, problem su finansijska sredstva, osim plana rekonstrukcije glavnog vrelovoda urađen je idejni projekt za sva prigradska naselja, između ostalog i dijela za koji je upitala vijećnica Aletović. Pošto je plan iz 2021. godine, sredstva dostatna za njegovu realizaciju iznosila su oko 22 miliona KM, što je sa današnjim tržišnim cijenama vjerovatno i više. Ono što je JP „Grijanje“ učinilo, a u skladu sa odlukom Općinskog vijeća, je da se projekat rekonstrukcije i proširenja daljinskog grijanja usmjerio na strateški federalni projekt i u saradnji sa Ministarstvom za okoliš na putu se da se to i ostvari. Širenje djelatnosti nije ugrozilo osnovnu djelatnost, postojeći radnici nisu preusmjereni na nove poslove, novi poslovi su korišteni za amortizaciju postojećih troškova. Za proširenje mreže grijanja preduslov je rekonstrukcija vrelovoda od TE što iziskuje ulaganja od oko 30 miliona KM. U vezi tužbi radnika, rekao je da nisu u pitanju tužbe već pokretanje izvršenja. Tužbe su pokrenute 2011. godine, za period 2008-2011 i riješene su nagodbom kojom su radnici trebali potraživati ta sredstva u slučaju privatizacije, pripajanja drugom društvu ili proglašenjem tehnološkog viška. U periodu 2022. godine isticao je desetogodišnji zastarni rok za izvršenje po rješenju i pojedini radnici su pokrenuli postupke izvršenja.

Nakon diskusije Vijeće je usvojilo Zaključak o prihvatanju Izvještaja o poslovanju JP „Grijanje“ d.o.o. Kakanj sa Finansijskim izvještajem i Izvještajem o reviziji finansijskih izvještaja za 2024. godinu, sa 22 glasa ZA, 2 glasa PROTIV i 2 glasa UZDRŽAN.

Vijeće je vodilo objedinjenu diskusiju o tačkama 11. i 12. dnevnog reda.

### **11. Tačka**

#### **Izveštaj o radu JU „Dom zdravlja sa stacionarom“ Kakanj sa Izveštajem o materijalno-finansijskom poslovanju za period 01.01-31.12.2024. godine**

### **12. Tačka**

#### **Plan rada i razvoja JU „Dom zdravlja sa stacionarom“ za 2025. godinu**

**Predlagač:** UO JU „Dom zdravlja sa stacionarom“ Kakanj

**Obrađivač:** UO JU „Dom zdravlja sa stacionarom“ Kakanj

**Izjavitelj:** Magbula Ganić, v.d. predsjednica UO i Nisvet Trako, direktor JU „Dom zdravlja sa stacionarom“ Kakanj

U diskusiji su učestvovali: Dževdet Huskić, Rešad Merdić, Hamza Vahid El-Din, Slaven Katičić i Mirsad Tursum u svojstvu direktora JU za izvještajni period.

**Dževdet Huskić:** je rekao da Izveštaj prije svega odražava ozbiljan rad sa 278.000 pruženih usluga, te naročito ulaganje u preventivu, dijagnostiku i kućnu posjetu, te pozitivno finansijsko poslovanje sa oko 147.000 KM viška prihoda nad rashodima. Također, pohvalio je i ulaganje u edukaciju mladog kadra i specijalizacije, što je ipak nedovoljno, obzirom da dosta tog kadra ode zbog boljih uslova rada na drugim mjestima. Kao problematične tačke naveo je nedovoljno finansiranje ove JU jer su sredstva ZZO ZDK nedovoljna, naročito za hitnu medicinsku pomoć, porodilište i zaštitu radnika i nedovoljna obzirom na okolinsku specifičnost Kaknja. Općina Kakanj se i dalje simbolično uključuje u pomoć ovoj JU i s te strane trebalo bi da se ta pomoć poveća. Vozni park je prilično dotrajavao i dosta je vozila neupotrebljivo zbog pređenih kilometara. Predložio je da se više ulaže u hitnu medicinsku pomoć, porodilište i centar za mentalno zdravlje, kao i da se istakne ekološka slika Kaknja prilikom apliciranja za sredstva sa viših nivoa vlasti, da se preduprijedi digitalizacija zakazivanja termina, da se još sredstava uloži u vozni park kao i da se mobilne službe razvijaju u skladu s demografskom slikom Kaknja. Na kraju je dodao da pozicija i opozicija u suštini imaju isti interes kad je u pitanju život građana Kaknja i da pitanja i inicijative koje predlaže opozicija služe isključivo u te svrhe, te da će uvijek podržati sve što se tiče unapređenja rada ove JU.

**Rešad Merdić:** je rekao kako treba naći načine da se kadrovski ojača ova JU kao i da se zajedničkim naporima treba djelovati prema ZZO ZDK kako bi se što više sredstava dobilo, obzirom na ekološke specifičnosti Kaknja. Upitao je kad će se realizovati projekt osposobljavanja hitne pomoći? U vezi ambulanti porodične medicine upitao je da li postoji mogućnost da se uvede rad u dvije smjene jer su neke ambulante preopterećene, te dokle se došlo sa puštanjem u rad ambulante Krševac?

**Hamza Vahid El-Din:** je upitao da li se specijalizacija 3-4 doktora koja je planirana za 2025. godinu odnosi na postojeće ili nove doktore.

**Slaven Katičić:** je rekao da razumije da je trenutno kadrovski teško pokriti sve ambulante na području općine Kakanj i izložio situaciju gdje pacijenti iz Kraljeve Sutjeske idu u ambulantu u Haljnićima. Apelirao je da se povede računa i pokuša riješiti ova situacija.

**Mirsad Tursum (odgovor):** je u svojstvu direktora za izvještajni period rekao da je ustanova i pored izazova u 2024. godini dobro poslovala i ostvarila višak prihoda nad rashodima u iznosu oko 150.000 KM. Također, rekao je da ZZO ZDK finansira 16,5 timova porodične medicine, a na području općine ih ima 22. ZZO ZDK ne finansira porodilište, niti medicinu rada, niti 4. tim hitne medicinske pomoći. Zahvalio se svima na riječima podrške i prepoznavanja truda uposlenika ustanove. U vezi edukacije osoblja rekao je da je kontinuirana, a što se tiče specijalizacije doktora rekao je to proces koji traje i da su trenutno na specijalizaciji 3-4 doktora, a u planu ove godine su još 3-4. Specijalizacija je nešto što iziskuje dupla sredstva jer se pored specijalizacije, plaća i doktor koji mijenja doktora na specijalizaciji. Rekao je da je učinjeno sve što je bilo raspoloživo da doktori i osoblje imaju razlog ostati u ovoj ustanovi. U vezi dodatnih sredstava, obzirom na specifičnosti ekološke situacije u Kaknju, rekao je da se ova ustanova stalno obraća sa tim zahtjevom prema ZZO ZDK, ali da oni nikad tome ne udovolje, pravdajući to sredstvima koje Općina Kakanj dobije naknadom od rada TE. Što se tiče autoparka, on nikad nije bio u boljem stanju i kontinuirano se obnavlja. Sistem naručivanja je sastavni dio porodične medicine što je praksa svugdje u svijetu samo što se stanovništvo još uvijek opire ovakvom uređenju, te

se onda stvaraju gužve. U vezi pitanja koja je postavio vijećnik Merdić rekao je da je teško zadržati doktore zbog toga što svi žele bolje uslove i za njima idu, na šta ustanova ne može utjecati. Što se tiče broja ambulanti rekao je da je Federalno ministarstvo zdravstva napravilo spisak nekad ranije, te da on ni tad, a ni danas ne odražava stanje na terenu, niti prati migracije stanovništva. U vezi ambulante Stara jama, rekao je da su trenutno aktuelna prijelazna rješenja, te da će se ići sa podizanjem spratova u Domu zdravlja kako bi se mogli primiti kapaciteti i tih pacijenata. Ustanova je što se tiče ambulante Krševac svoj posao obavila, problem je voda koja nije higijenski ispravna i taj dio nije u nadležnosti ustanove. Vijećniku Katičiću je rekao da je preusmjeravanje pacijenata u ambulantu u Haljiniće prelazno rješenje i zbog godišnjih odmora.

**Rešad Merdić:** je rekao da je ambulanta u Brnjicu uvijek imala dva tima, te upitao zašto se ne bi radilo u dvije smjene. Upitao je općinskog načelnika zbog čega Općina ne posreduje kako bi se priključak vode riješio.

**Mirsad Tursum (odgovor):** je rekao je da je tačno da je ova ambulanta imala dva tima, ali to je bilo prije migracija stanovništva, te je sada stanje na terenu takvo da nema pacijenata ni za jedan tim

Nakon diskusije Vijeće je usvojilo Zaključak o prihvatanju Izvještaja o radu JU „Dom zdravlja sa stacionarom“ Kakanj sa Izvještajem o materijalno-finansijskom poslovanju za period 01.01-31.12.2024. godine, sa 21 glasom ZA, bez glasova PROTIV i 4 glasa UZDRŽAN (vijećnik Buza se izuzeo od glasanja), te je usvojilo Zaključak o prihvatanju Plana rada i razvoja JU „Dom zdravlja sa stacionarom“ za 2025. godinu, jednoglasno sa 25 glasova ZA.

### **13. Tačka**

#### **Informacija o zdravstvenom stanju stanovništva općine Kakanj i informacija o epidemijama u 2024. godini**

**Predlagač:** UO JU „Dom zdravlja sa stacionarom“ Kakanj

**Obradivač:** UO JU „Dom zdravlja sa stacionarom“ Kakanj

**Izjestilac:** Ibrahim Aličković, šef HES-a JU „Dom zdravlja sa stacionarom“ Kakanj

U diskusiji su učestvovali: Dževdet Huskić i Mirnes Pipo.

**Dževdet Huskić:** je izrazio poštovanje prema predanom trudu i radu dr. Aličkovića i dodao da se, nažalost, u Informaciji preporuke na kraju dokumenta godinama ne mijenjaju, što je indikator ozbiljnosti pristupa ovoj tematici. Na kraju je dodao da preporuke već obuhvataju teme o kojima se na sjednicama Vijeća govori, kao što je problem deponije smeća, te da nema razloga da se konačno ne krene i u njihovu realizaciju.

**Mirnes Pipo:** je rekao da je iz Informacije evidentno da su među vodećim oboljenjima ona koja se tiču respiratornih organa što pokazuje loš kvalitet zraka u Kakanju. Također, raste broj onkoloških pacijenata, te je predložio da se sredstva koja se dobijaju od naknade od rada TE preusmjere na liječenje tih pacijenata, kao i da se uspostavi registar onkoloških bolesnika. Na kraju je dodao da na primjeru zajedničkog stava po pitanju „Bioorganike“ treba djelovati i ubuduće, a sve da bi se unaprijedila zdravstvena slika stanovništva općine Kakanj.

Nakon diskusije Vijeće je jednoglasno sa 25 glasova ZA usvojilo Zaključak o primanju k znanju Informacije o zdravstvenom stanju stanovništva općine Kakanj i informacije o epidemijama u 2024. godini.

### **14. Tačka**

#### **Prijedlog odluke o imenovanju člana Općinske izborne komisije**

**Predlagač:** Kolegij Općinskog vijeća

**Obradivač:** Stručna služba za poslove Općinskog vijeća

U diskusiji nije niko učestvovao, a Vijeće nije usvojilo Odluku o imenovanju Alme Neimarlija za člana Općinske izborne komisije, sa 8 glasova ZA, bez glasova PROTIV i 15 glasova UZDRŽAN.

## **15. Tačka**

### **Prijedlog rješenja o privremenom imenovanju predsjednika UO JU „Dom zdravlja sa stacionarom“ Kakanj**

**Predlagač:** Komisija za izbor i imenovanja

**Obrađivač:** Stručna služba za poslove Općinskog vijeća

**Izjavitelj:** Hamza Vahid El-Din, predsjednik Komisije

**Hamza Vahid El-Din:** je ispred Komisija je predložio da se za predsjednika UO JU „Dom zdravlja sa stacionarom“ Kakanj, na privremeni period imenuje Magbula Ganić.

U diskusiji nije niko učestvovao i Vijeće je usvojilo Rješenje o privremenom imenovanju Magbule Ganić za predsjednicu UO JU „Dom zdravlja sa stacionarom“ Kakanj, sa 21 glasom ZA, bez glasova PROTIV i 3 glasa UZDRŽAN,

Predsjedavajući je zaključio rad 8. redovne sjednice Općinskog vijeća u 13:00 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
Emir Zaimović

**PREDSJEDAVAJUĆI  
OPĆINSKOG VIJEĆA**  
Slaven Katičić